

E PËRGJITHËSHIMEJA LETËR' E TRETË E APOSTULLIT GJIONN

1 ¹ Unë plaku mbë Gaionë të dashuninë, të cillin' un' e due ndë të vërtetët.

² I dashunë, për të gjitha lutem të veç mbarë e të jesh shëndoshë, sikurse vete mbarë shpirti yt.

³ Sepse u gëzueshë shumë, se vinë vëllazën, edhe deshmojnë për të vërtetënë tate, sikurse ti ecën ndë të vërtetët.

⁴ S'kam ma të math gëzim se këte, të ndëgjoj se dielmt' e mi ecinë ndë të vërtetët.

⁵ I dashunë, *punë* besëtari ban qish të bajsh mbë vëllazënit e mbë të huejët,

⁶ të cillëtë deshmuënë për dashuninë tate përpara kishësë; ndë i përsiellsh ata sikurse vëjen te Perëndia, ke me bamë mirë.

⁷ Sepse duelnë për emënin' e ati, pa marrë gja prej kombevet.

⁸ Na pra kemi detyrë me pritunë të tillë *nierës*, qi të bahemi ndifmëtarë ndë të vërtetënë.

⁹ I shkrova kishësë, por Diotrefi ai qi don parësi ndër ata, nukë na pret,

¹⁰ përandai nd'arthsha, do t'i kuitoj punët' e ati qi ban, tue na përqeshunë me fjalë të këqia; edhe tue mos i mbastuem këto, as ai vetë nukë pret vëllazënitë, por edhe ata qi duenë *me i pritun'* i ndal, edhe i nxier jashtë kishet.

¹¹ I dashunë, mos shko mbrapa të keqesë, por të mirësë. Ai qi ban mirë, ashtë prej Perëndiet, por ai qi ban keq, nuk' e ka pamë Perëndinë.

¹² Për Demetrin' epetë deshmi e *mirë* prej të gjithësh, edhe prej asai të vërtetësë; edhe na apimë deshmi, edhe e dini se deshmia jonë, ashtë e vërtetë.

¹³ Kishiem me shkruem shumë por nukë due me të shkruem me mellan e me pendë,

¹⁴ por shpërej me të pamë për së shpeiti, edhe kemi me folunë gojë me gojë.

¹⁵ Paqtim mbë tyi. Të falenë me shëndet miqtë. U fal me shëndet miqvet emënë për emënë.